

- do vûr er gesichtecliche 105
in daz hymmelriche.
dannen sal er abir kom^men,
mit warheit han wir daz vernommen.
so mûz al daz volk erstan.
da sal mennislich entphan 110
lon al nach den werken sin.
daz sal wesen der gloûbe din:
den gûten allen gliche
wirt daz hymmelriche
339^b vnd vnsagelichez gût: 115
den ârgen wirt der helle glût
vnd hitze also manichûalt.
ir fûur enwirt nummer kalt,
sie sint vmm^{er} ane licht,
ir wûrme die versterbent nicht. 120
waz sie hie verdienen (*so*)
die wile daz sie lebten.
mit worten also manichûalt
mit vnsers herren geistes gewalt
so sprach (er) alle diese wort. 125
dar nach wiste er eme den hort
der rechten gotes gûde gar,
wer sich mit rûwe keret dar,
wer zuzeme gahet,
daz er den gerne enphahet. 130
noch saget er eme mere
daz so groz nummer enwere
keiner slachte sûnde
die vberwinden kûnde
die rechten gotes gûde 135
an deme der sin gemûte
an en mit rechteme rûwen lat.
die serift mit manigeme bilde hat
daz vil wol geuestenot
daz in vil gerne enpfahet got 140
an alle missewende.
340^a sûz waz der rede ein ende.